

Naqqiut

Akissuteqaatip akissuteqaat 13. September 2022-meersoq taarserpaa

Makku naqqiutigineqarput: Umiarsuit tikittarneri pillugu allakkiaq immikkoortoq peerneqarpoq.

Tunup sineriaani nunami tunisassiorfinnut tunisisussaatitaanerup atuutilersinne-qarnissaanut periarfissamik Naalakkersuisut misissueqqullugit peqquneqarnissaannik inatsisartut aalajangiiffigisassaattut siunnersuut.

(Inatsisartunut ilaasortaq Mala Høy Kuko, Siumut)

Akissuteqaat

(Aalisarnermut Piniarnermullu Naalakkersuisoq)

Siullermeerneqarnera

Tunup sineriaani nunami tunisassiorfinnut tunisisussaatitaanerup atuutilersinneqarnissaanut periarfissamik Naalakkersuisut misissueqqullugit peqquneqarnissaannik inatsisartut aalajangiiffigisassaattut siunnersuuteqartoq Inatsisartunut ilaasortaq Mala Høy Kúko, Siumut, saqqummiussaqarneranut Naalakkersuisut qutsavigaat. Nassuaat UKA 2023 nallertinnagu Inatsisartunut agguaanneqassasoq siunnersuutaalluni.

Kalaallit Nunaat tamakkerlugu ineriartortoqarnissaa Naalakkersuisut pingaartitorujussuuat. Ingammik aalisarnermut tunngasutigut soorlu siunnersuummi oqaatigineqarpoq Kalaallit Nunaanni inuiaqtigijit aningaasaqarnerannut aalisarneq pingaaruteqarluiinnartoq. Tunumi aalisarnermit Kitaani aalisarneq ineriartornerusimaneranik oqarneq eqqorpoq taamaattumillu aningaasaqarnermut sunniuteqarluarluni. Aamma Tunumi silap pissusaanut atatillugu periarfissat Kitaaninngarnit allaanerusut oqaatigineqarput, aalisarnerullu ineriartortinnissaanut ajornartorsiørulersitsisinnaallutik. Tunup sineriaani sikorsuit annertuumik takkusimaartnarerat pissutaalluni ukiup ilarujussuani tamaviaarnarnerpaagajunneruvoq aalajangiisunnerpaagajullunilu. Kitaani sinerissamisut periuseqarluni Tunumi tulaassisussaatitaanerup atornissaanut silap pissusaanut atatillugu periarfissanut akornusiisutut kisimik killiliisuunngillat.

Kitaani attaveqaasersuuteqarnermit Tunumi attaveqaasersuuteqarneq allaanerujussuuvoq. Soorlu aamma aalisakkanik nioqqutissiassanik tulaassinermi talittarfik atorneqarsinnaasoq ataasiinnaavoq, tunitsiviusinnaasutuarlu Kuummiuniilluni. Ilaatigut Kuummiut atorneqartarput, umiarsualivik taanna ukiup annersaa sikoqartannginnera pissutigalugu, umiatsiaaqqat angallatillu tunisisinnaasarput. Ajoraluartumilli umiarsualivik mikisuuvooq, umiarsualiviullu itissusia angallatinik mikinerusuinnarnit aalisakkanik nioqqutissianik tulaassiffiusinnaavoq. Imaappoq angallatit anginerit usiminnik Kuummiuni tunitsivimmut tulaassisinnaanngillat. Tamatuma saniatigut tunitsivik ukiuunerani matoqqasarloq.

Kilisaassuit tulaassiffigisinnaasaannik pisaminillu tulaassiffigisinnaasaannik naammattumik itissusilimmik Tunumi allanik umiarsualiveqanngilaq. Tamatuma saniatigut umiarsualiviit taakkua ukioq tamaat ammaannarnissaannut silap pissusaanut tunngasut sikorsuillu akornutaapput. Tunumi umiarsualiviit ukiuunerani matoqqasarloq, tamannalu tunisinissamut

piffissap ilaanni killiliisarluni. Umiarsualiviit ukiuunerani matoqqasarnerisa akuttusuunillu umiarsuarnik assartuutinik tikittoqartarnerata aalisakkanik nioqqtissiat avammut tunisassat umiarsuakkut nassiuinneqarsinnaanerat aamma killilerpaa.

Tamatuma saniatigut oqaatigineqartutut Tunumi, Kuummiut, maannakkut ataasiinnarmik tunitsiveqarpoq, taannalu tunitsivik sinerissap qanittuani aalisarnermit tigusaariikkaminit annertunerusumik tigusinissamut piginnaasaqanngilaq.

Tunumi tunisisussaatitaanerup atuutilersinneqarsinnaaneranut attaveqaasersuutit annertus-susiisa naleqqussarneqarnissaannut annertuunik aningaasaliisoqarnissaa pisariaqassaaq.

Eqqortuuvoq Tunumi suliffissanik pilersitsisoqarnissaanik pisariaqartitsisoqartoq. Aallaq-qasaiillunga oqaatigeriikkattut, Kalaallit Nunaat tamakkerlugu ineriartornerup qulakkeerneqarnissaan Naalakkersuisunut pingaaruteqarpoq. Taamaattumik Tunumi aalisarnermut tunngasunik ineriartortitsisinnaanissamut periafissanik suliaqarnissamut suleqatigiissitamik pilersitsisoqarpoq. Piffinnit pineqartunit, Tasiilamit nunaqarfiiillu kiisalu Ittoqqortoormiormiunit inuttalersorneqatumik.

Suleqatigiissitami Tunumi aalisartut piniartullu peqataatinneqarlutik akuutinneqarnissaat aallaavigineqarpoq taakkumi pisariaqartitatik nalunngimmatigit najukkaminnilu ineriartortitassat pisariaqartinnejartut pillugit isummersueqataasinnaaqqullugit. Tamatuma kinguneriaanik Tunumi illoqarfiit nunaqarfiiillu tamarmik suleqatigiissitami sinniisuititassaat aggersarneqassapput nunaqarfiiillu tamangajalluinnaarmik sinniisuititassaminnik toqqaareersimapput. Inuussutissarsiuteqartuniit Arctic Prime Fisheries, Royal Greenland, Kommuneqarfik Sermersooq kiisalu KNAPK peqataassapput. Aalisarnermut Piniarnermullu Naalakkersui-soqarfik suleqatigiissitap suliai eqqarsaatigalugit ikorfartuisuussaaq.

Suleqatigiissitap suliassaa siulleq tassaavoq Naalakkersuisunit akuerineqartussamik Tunumi aalisarnerup ineriartortinnejarnissaanut pilersaarusiornissaq. Tunumi aalisarnermik inuussutissarsiut ineriartortissagutsigu piniartuunermiit aalisarnermik inuussutissarsiummut ikaarsaariarnissamut tunngatillugu siunissaq ungasinnerusoq isigalugu pilersaaruteqarnissaq aammalu ilisimasanik paassisutissanillu katersinissaq pingaaruteqarpoq taamaasiornikkut aalisarnermik aqutsinermi Tunumi immikkut pisariaqartitanut naleqqussaasoqarsin-naassammat. Ilimanarpoq ineriartornissamut pilersaarutip pilersitseqataanissaa Tunumi suliffissaqartitsiniarnermut qanittumut ungasinnerusumullu isigaluni.

Ilaatigut tamatuma kinguneriaanik Naalakkersuisut aalajangerput aningaasanut inatsimmi kontomi 50.01.20 suliniutinut kontomi aningaasat sinneruttut Tunumi Kujataanilu suliniutinut atorneqassasut. Tassani Tunu pillugu suleqatigiissitaq soorlu pikkorissartitsinissanut suliniutinullu ineriartortitsinermut aamma suliffissaqartitsinermut iluaqutaasinnaasunut ingerlatssinissaminut qitiusumik inissisimasussaassaaq. Tamatuma saniatigut aalisarnermi suliniutissanut soorlu Tunumi aningaasanut inatsit aqqutigalugu aningaasaliissutaasartut 2023-mi 1 million kr.-nik ilaneqarnissaat siunnersuutigaarpot.

Suliassaq piffissamik aalajangikkamik naammassiffissalerneqarsimannngilaq ineriertortitsinis-samulli pilersaarutip 2023 ilanngullugu suliarineqarnissa naatsorsuutigineqarpoq tamatumalu kingorna suleqatigiisitap allatulluunniit ilusilerlugu aammalu ineriertortitsinissamut pilersaarutip piviusunngortinnissaata tungaanut ingerlaqqinnissa pisariaqassaaq.

Taamaattumik isumaqarpugut aningaasat nukiillu pineqartut Tunumi aalisarnerup ineriertortinnejarnissaanut atorneqarunik isumatusarnerussalluta. Tunumi aalisarnerup ineriertortinnejarnissaanut aalisartut piniartullu ineriertortitsinissamut tunngatillugu amigaataasunik saqqummiisinnaanissaminnut periarfissaqassapput. Pineqartut saniasigut tunisassiortut, kom-muni Aalisarnermut Piniarnermullu Naalakkersuisoqarfillu suleqatigiisitami suleqataassapput. Suleqatigiisitap taaneqartutut assigiinngitsunit ilaasortalersorneratigut susassaqartut pisortallu suleqatigiillutik ikorfartoqatigiillutillu ineriertotitsisinnaanissaat qulakkeerneqassaaq.

Soorlu Naalakkersuisut Tunumi aalisarnerup ineriertortinnejarnissa pingaartillugu oqaatigereeraat, siunnersuuteqartullu siunnersuuteqarnermini siunertai aalisarnerup ineriertortinnejarnissaanut suliassatut pingaartutut Naalakkersuisut isumaqatigigamikkit siunnersuutip suleqatigiisitami maanna pilersinneqarlunilu ingerlasussangoreersumut suliassaannut ilanngullugit aamma nukiit aalisarnerup siunissaq ungasinnerusoq eqqarsaatigalugu ineriertortitsinissaanut atorneqarnissaat qulakkeerumallugu. Naalakkersuisut taamaattumik isumaqarput Tunumi aalisarnerup ineriertortinnejarnissaanut suliniutissaajunnartut ataasiakkaat aallartinnejarnissaat eqqarsaatigalugu Tunu pillugu suleqatigiisitap suliaasa naammassineqarnissaat Tunumilu ineriertortitsinissamut pilersaa-rutissaq utaqqimaarneqaaqqaartariaqartoq.

Naalakkersuisut qulaani toqqammavilersuutit aallaavigalugit inassutigissavaat imatut allanngutissatut siunnersuuteqarnissaq:

Tunup sineriaani nunami tunisassiorfinnut tulaassisussaatitaanerup atuutilersin-neqarnissaanut periarfissamik Naalakkersuisut misissueqqullugit suleqatigiisitap sulilluni aallartilereersup suliaassaanut ilanngullugu suliarineqarnissaanik inatsisartut aalajangiiffigisassaattut siunnersuut.